

Die 13. Decembris.

Sancti Jodoci Confessoris,

Patroni Ecclesiæ Parochialis et Patroni minus
Principalis Civitatis Landshut.

Duplex 1. classis.



Introitus. Ps. 36.

OS justi meditabitur sapientiam, et lingua ejus loquetur judicium; lex Dei ejus in corde ipsius.

Ps. ib. Noli æmulari in malignantibus: neque zelaveris facientes iniquitatem. V. Glória Patri.

Oratio.

Deus, qui beatum Jodocum Confessorem tuum de terreno regno ad cœlestis regni glóriam transulisti: ejus, quæsumus, méritis et intercessióne regis regum Jesu Christi filii tui fácias nos esse consórtes. Qui tecum vivit et regnat.

Lectio libri Sapiéntiæ.

Eccli. 31.

Beatus vir, qui inventus est sine mácula, et qui post aurum non abiit, nec speravit in pecúnia et thesaúris. Quis est hic, et laudábimus eum? Fecit enim mirabilia in vita sua. Qui probatus est in illo, et perfectus est; erit illi glória æterna: qui pótuit transgredi, et non est transgressus; fácere mala, et non fecit: ideo stabilita sunt bona illius in Dómino, et eleemósynas illius enarrábit omnis Ecclesiá Sanctórum.

Graduale. Ps. 91. Justus ut palma florébit: sicut cedrus Líbani multiplicábitur in domo Dómini.

V. Ad annuntiandum mane misericórdiam tuam, et veritatem tuam per noctem.

Allelúja, allelúja.

V. Jac. 1. Beátus vir, qui suffert tentationem: quóniam cum probatus fúerit, accípiet coronam vitæ. Allelúja.

Sequéntia sancti Evangélii secúndũ Matthæum. Matth. 19. d.

IN illo témpore: Dixit Petrus ad Jesum: Ecce nos reliquimus ómnia, et secúti sumus te: quid ergo erit nobis? Jesus autem dixit illis: Amen dico vobis, quod vos, qui secúti estis me, in regeneratióne, cum séderit Fílius hóminis in sede majestátis suæ, sedébitis et vos super sedes duódecim, judicántes duódecim tribus Israël. Et omnis, qui reliquerit domum, vel fratres, aut soróres, aut patrem, aut matrem, aut uxórem, aut filios, aut agros, propter nomen meum, céntuplum accípiet et vitam ætérnam possidébit.